


二十五史補編

隋唐五代五史
補編



北京圖書館出版社

隋書卷之五

隋書卷之五

楊廣
楊廣

二十五史補編

隋唐五代五史 補編

北京圖書館出版社



第二冊目錄

隋書經籍志考證(二)	姚振宗		一
------------	-----	-------	---

隋書經籍志考證卷十五

史部五

起居注類

穆天子傳六卷汲冢書郭璞注

郭璞有毛詩拾遺見經部詩類

晉侍中書監光祿大夫濟北侯臣荀勗序

曰古文穆天子傳者太康二年汲縣民不準

盜發古冢所得書也皆竹簡素絲編以臣勗

前所考定古尺度其簡長二尺四寸以墨書

一簡四十字汲冢者戰國時魏地也案所得紀

年蓋魏惠成王子今王之冢也於世本蓋襄

王也案史記六國年表自今王二十一年至

秦始皇三十四年燔書之歲八十六年及至

太康二年初得此書凡五百七十九年其書

言周穆王游行之事春秋左氏傳曰穆王欲

肆其心周行于天下將皆使有車轍馬跡焉

此書所載則其事也王好巡守得盜驪騮耳

之乘造父爲御以觀四荒北絕流沙西登昆

侖見西王母與太史公記同汲郡收書不謹

多毀落殘缺雖其言不典皆是古書頗可觀

覽謹以二尺黃紙寫上請事平以本簡書及

所新寫並付祕書繕寫藏之中經副在三閣

謹序

春秋經傳集解後序正義引王隱晉書束皙

傳曰周王遊行五卷說周穆王游行天下之

事今謂之穆天子傳

晉書束皙傳竹書敍目曰穆天子傳五篇言

周穆王游行四海見帝臺西王母

晉書郭璞傳璞又注三倉方言穆天子傳並傳於世

本志篇敍曰晉時得汲冢書有穆天子傳體

制與今起居注正同蓋周時內史所記王命

之副也

唐書經籍志穆天子傳六卷郭璞注一本注誤

作撰

唐書藝文志郭璞穆天子傳六卷

宋史藝文志別史類郭璞注穆天子傳六卷

晁氏讀書志傳記類穆天子傳六卷晉太康

二年汲縣民盜發古冢所得凡六卷八千五

百一十四字詔荀勗和嶠等以隸字寫之郭

璞注本謂之周王遊行記勗之時古文已不

能盡識時有缺者又轉寫益誤殆不可讀

陳氏書錄解題穆天子傳六卷晉武帝時汲

冢所得書其體制與起居注正同郭璞爲之

注

玉海藝文傳記類穆天子傳中興書目六卷

拾遺記曰穆王三十二年巡行天下有書史

十人記其所行之地

四庫小說家提要曰按晉書束皙傳云穆天

子傳五篇又雜書十九篇周食田法周書論

楚事周穆王美人盛姬死事按今盛姬載穆

天子傳第六卷蓋即束皙所謂雜書之一篇

也尋其文義應歸此傳束皙傳別出之非也

此書紀事有月日而無年又文多斷缺所紀

雖多夸言寡實然所謂西王母者不過西方

一國君所謂懸圃者不過爲飛鳥百獸之所

飲食爲大荒之圃澤無所謂神仙怪異之事

所謂河宗氏者亦僅國名無所謂魚龍變見

之說較山海經淮南子猶爲近實列子周穆

王篇所載與此傳相出入蓋當時流俗有此

載記如後世小說野乘之類故列禦寇得撫

拾其文耳世所傳汲冢書師春之類久已亡

佚逸周書又屬誤入紀年僞妄顯然其真存

於今者惟此傳矣

又簡明目錄曰穆天子傳六卷汲冢古本晉

郭璞注所紀周穆王西行之事爲經典所不

載而與列子周穆王篇互相出入知當時委

巷流傳有此雜記舊史以其編紀日月皆列

起居注中今改隸小說以從其實

臨海洪頤煊校刊序曰案史記穆王在位五

十五年此書所載尋其甲子不過四五年間

事耳雖殘編斷簡其文字古雅信非周秦以

下人所能作尤足與經史相證據晁志云書

凡六卷八千五百一十四字今本僅六千六

百二十二字則又非晁氏所見之本矣

漢獻帝起居注五卷

不著撰人

袁宏後漢紀序曰聊以暇日撰集爲後漢紀

其所掇會有漢山陽公紀漢靈獻起居注

本志篇敍曰起居注者錄紀人君言行動止

之事春秋傳曰君舉必書書而不法後嗣何

觀周官內史掌王之命遂書其副而藏之是

其職也漢武帝有禁中起居注後漢明德馬

后撰明帝起居注然則漢時起居似在宮中

爲女史之職然皆零落不可復知今之存者有漢獻帝及晉代已來起居注皆近侍之臣所錄

唐書經籍藝文志漢獻帝起居注五卷

章氏考證魏志武紀注文紀注董卓傳注鄧原傳注蜀志先主傳注續漢禮儀祭祀五行百官與服志注後漢書獻紀董卓傳注初學記太平御覽職官部通典禮門注並引獻帝起居注共數十事

侯康補三國藝文志曰唐六典漢獻帝及西晉以後諸帝皆有起居注皆史官所錄康按此書隋志不著撰人後漢書及續漢書志三國志諸注屢引之魏文帝紀注引一條云建安十五年爲司徒趙溫所辟太祖表溫辟臣子弟選舉故不以實使侍中守光祿勳鄧慮持節奉策免溫官稱曹操爲太祖則此書成於魏時也

按袁宏言靈獻起居注則晉時尙有靈帝起居注至隋而僅存此帙獻帝於少帝昭寧元年九月爲董卓所立改元永漢未幾仍稱中平六年靈帝末年之號也明年改元初平初平盡四年改元興平興平盡二年改元建安建安盡二十四年改元延康延康元年之十月遜位首尾凡三十二年自遜位之後自不得再有起居注起居注所記自不得連及山陽就封之後故其記後事別有漢獻帝傳山陽公記諸書在焉書中稱太祖書名題獻帝稿爲魏人手筆史

通正史篇云及在許都楊彪頗存注意意即是彪所存彪卒于魏文帝黃初六年其改稱太祖稱獻帝則皆在魏明帝青龍二年之後矣

晉泰始起居注二十卷李軌撰

李軌有周易音見經部易類晉書武帝本紀泰始六年秋七月乙巳詔曰自泰始以來大事皆撰錄祕書寫副後有其事輒宜綴集以爲常

本志篇敘曰今之存者有晉代已來起居注皆近侍之臣所錄今依其先後編而次之

唐書經籍志晉太始起居注二十卷李軌撰

唐書藝文志李軌晉泰始起居注二十卷

章氏考證蜀志諸葛瞻傳注藝文類聚太平御覽果部並引晉泰始起居注

按晉武受魏禪改元泰始時蜀漢亡已二年吳孫皓甘露元年猶未混一也泰始紀

元凡十年

晉咸寧起居注十卷李軌撰

唐書藝文志李軌咸寧起居注二十二卷

章氏考證藝文類聚服飾部鳥部引一事題

晉咸寧起居注初學記服飾部北堂書鈔衣冠部太平御覽服章部並引之唐志二十二卷

按武帝改元咸寧時孫皓天冊元年也咸寧紀元凡五年

晉泰康起居注二十一卷李軌撰

唐書經籍志晉太康起居注二十二卷李軌

撰藝文志同

章氏考證初學記職官部藝文類聚食物部御覽職官部兵部車部器物部飲食部並引太康起居注唐志二十二卷又書鈔設官部御覽皇親部職官部並引晉武帝起居注

按泰康元年三月平吳天下一統因而大赦改元泰康泰康紀元凡十年後改元太

熙太熙元年四月武帝崩惠帝立武帝在位二十六年改元四

晉元康起居注一卷

不著撰人

按惠帝元康紀元凡九年在永平之後本志引七錄別有永平元康永寧起居注六卷此一

卷即七錄之佚存者

梁有永平元康永寧起居注六卷亡

唐書經籍志晉永平起居注八卷李軌撰藝文志同

按惠帝即位不踰年改元永熙明年正月詔改永熙爲永平元年是年三月以誅楊駿等大赦改元爲元康元康紀元凡九年

明年正月改元永康永康二年正月趙王倫篡位四月反正大赦改元爲永寧永寧紀元止於明年十二月其後又改太安永

安建武永興光熙惠帝在位十七年凡十改元章氏考證云初學記服飾部引永安

起居注記太康四年事恐誤

又按兩唐志八卷似即此六卷及後惠帝起居注二卷合併爲帙者亦皆李軌所撰

錄歟

梁又有惠帝起居注二卷亡

不著撰人

玉海藝文記注類魏志注案陸機惠帝起居

注宋書傅亮與蔡廓書引陸士衡起居注

章氏考證宋書蔡廓傳魏志張燕傳注各引

一事題陸機晉惠帝起居注又魏志趙儼傳

注世說言語篇文學篇賞鑒篇注北堂書鈔

儀飾部武功部御覽皇親部服章部服用部

共引惠帝起居注十三事不著撰人

按陸機本傳元康中累遷太子洗馬著作

郎其撰起居注當在斯時然不知是否即

此二卷也

梁又有永嘉建興起居注十三卷亡

不著撰人

唐書經籍志晉愍帝起居三十卷李軌撰

按懷帝紀元永嘉凡六年愍帝紀元建興

凡四年皆爲劉聰所弑舊唐志作三十卷

似即此十三卷又但稱愍帝則又似別爲

一本爲李軌所撰錄者

晉建武大興永昌起居注九卷梁有二十卷

不著撰人

唐書經籍志晉建武大興永昌起居注二十

二卷藝文志同

章氏考證太平御覽服用部引建武起居注

一事職官部引大興起居注二事儀飾部引

永昌起居注一事

按元帝本紀建武元年三月辛卯即晉王

位改元建武次年三月愍帝崩間至景辰

即皇帝位改元大興大興紀元凡四年明

年改元永昌是年四月王敦舉兵入京師

閏十一月己丑帝崩在位凡六年改元三

晉元康起居注一卷

不著撰人

按其前已有元康起居注一卷此重出其

目篇敘言晉代起居注依其先後編而次

之則是篇部居最有條理按元帝之後爲

明帝明帝在位三年改元太寧疑此即太

寧起居注

晉成和起居注十六卷李軌撰

晉咸康起居注二十二卷

李軌見前

唐書經籍志晉成和起居注十八卷李軌撰

晉咸康起居注二十二卷李軌撰藝文志同

章氏考證藝文類聚果部太平御覽器物部

羽族部並引晉成和起居注唐志十八卷又

類聚歲時部布帛部器物部本部並引晉咸

康起居注

按成帝成和紀元凡九年改元咸康凡八

年咸康起居注本志不著撰人據兩唐志

亦李軌所撰也

晉建元起居注四卷

不著撰人

唐書經籍志晉建元起居注四卷藝文志同

章氏考證北堂書鈔設官部太平御覽職官

部並引晉康帝起居注

按康帝在位二年改元建元

晉永和起居注十七卷梁有二十四卷

晉升平起居注十卷

並不著撰人

唐書經籍志晉永和起居注二十四卷晉永

平起居注十卷按永平爲升平之誤章氏謂晉唐志

缺升平起居注者非也藝文志作升平不誤

章氏考證初學記樂部寶器部並引晉永和

起居注白帖御覽亦引之

按穆帝即位年二歲太后臨朝攝政改元

永和凡十二年明年正月帝加元服始親

萬幾改元升平凡五年崩

晉隆和興寧起居注五卷

不著撰人

唐書經籍志晉崇和興寧起居注五卷

唐書藝文志晉隆和興寧起居注五卷

錢塘梁耆庭立紀聞曰唐人避諱改隆和爲

崇和

按哀帝即位紀元隆和凡一年明年改元

興寧凡三年崩

晉泰和起居注六卷梁十卷

不著撰人

唐書經籍志晉太和起居注六卷藝文志同

按海西公紀元太和凡五年明年十一月

桓溫宣崇德太后令廢帝爲東海王後降

封爲海西公徙居吳縣勅吳國內史刁韞

防衛又遣御史顧允監察之帝知天命不

可再深慮橫禍乃杜塞聰明無思無慮終

日酣暢耽於內寵有子不育庶保天年時人憐之爲作歌焉太元十一年十月甲申薨於吳時年四十五

又按本志以此六卷次咸安起居注之後與志序言依先後編次之例不符當是轉寫之誤今移易之

晉咸安起居注三卷

不著撰人

唐書經籍志晉咸安起居注三卷藝文志同

按簡文帝以海西公太和六年十一月己酉以會稽王爲桓溫所立元帝少子也改元咸安明年七月乙未崩咸安紀元凡二年實止於九月也

晉寧康起居注六卷

晉泰元起居注二十五卷梁五十四卷

並不著撰人

唐書經籍志晉寧康起居注六卷晉太元起居注五十二卷藝文志同

章氏考證世說賞鑒篇注御覽車部並引晉泰元起居注又曰藝文類聚儲宮部御覽皇親部並引晉孝武起居注章氏既載泰始咸寧泰康起居注三部又別出晉武帝起居注既載元寧康泰元起居注亦三部又別出康帝孝武帝起居注皆注云不著錄此但以諸書稱引偶異未嘗詳考歷朝年號遂以爲別是一書眩惑殊甚也

按孝武帝即位年十歲崇德太后臨朝紀元寧康凡三年明年正月帝加元服皇太后歸政大赦改元太元太元二十一年秋

九月崩

晉隆安起居注十卷

晉元興起居注九卷

晉義熙起居注十七卷梁三十四卷

並不著撰人

唐書經籍志晉崇寧起居注十卷晉元興起居注九卷晉義熙起居注三十四卷藝文志同按隆安作崇寧者唐宋人避諱改也梁書立紀問晉言之章氏又別出崇寧起居注十卷注云不著錄見唐志

豈不知晉代無崇寧之號乎

章氏考證太平御覽果部引晉隆安起居注一事藝文類聚舟車部北堂書鈔舟部藝文部儀飾部太平御覽天部服章部器物部果部榮茹部香部並引晉義熙起居注

按安帝紀元隆安凡五年改元元興凡三年元興元年三月桓玄反入京師明年十二月玄篡位以帝爲平固王帝蒙塵於尋陽次年又爲玄僞至江陵南郡及督護馮遷斬桓玄又復蒙塵於桓振賊營明年正月反正大赦改元義熙義熙十四年十二月崩帝不惠自少及長口不能言雖寒暑之變無以辨也凡所動止皆非己出故桓玄之篡因此獲全劉裕將爲禪代密使王韶之縊帝而立恭帝

晉元熙起居注二卷

不著撰人

唐書經籍志晉元熙起居注二卷藝文志同按恭帝本紀義熙十四年十二月戊寅安

帝崩劉裕矯詔立帝是日即位明年改元元熙元熙二年夏六月壬戌劉裕至於京師甲子遂禪位遜於琅邪第劉裕以帝爲零陵王居於秣陵宋永初二年九月丁丑弑帝於內房年三十六諡恭皇帝

晉起居注三百一十七卷宋北徐州主簿劉道會撰梁有三百二十二卷

劉道會始末未詳道會亦作道晉唐書藝文志故事類有劉道會先朝故事二十卷

唐書經籍志晉起居注三百二十卷劉道會撰

唐書藝文志劉道晉起居注三百二十卷章氏考證曰昔人徵引晉代起居注其不著年號而統稱晉者逸篇最多證以隋唐志所載蓋原本卷數至三百二十二卷宜徵引之多也北堂書鈔太平御覽尤多引之其書自武帝至安帝總記兩晉當是合諸家而成一書多晉書紀志列傳所不載者章氏此輯本頗可觀惜乎其不傳

流別起居注三十七卷

不著撰人

金樓子聚書篇曰爲揚州刺史時就吳中諸士大夫寫得起居注又得徐勉起居注梁書徐勉傳勉勤著述雖當機務下筆不休嘗以起居注煩雜乃加刪撰爲別起居注六百卷爲下敍流字南史本傳乃撰爲流別起居注六百六十卷唐書藝文志流別起居注四十七卷

按此及唐藝文志所載似皆徐勉之殘本
徐勉有梁選部別見後職官類

梁有晉宋起居注鈔五十一卷晉宋先朝起居
注二十卷亡

並不著撰人

唐書藝文志何始真晉起居鈔鈔注字五十
一卷晉起居注鈔二十四卷

章氏考證唐志有何始真晉起居鈔晉起居
注鈔二書俱不言宋

按何始真宋季時人有春秋左氏區別見
經部春秋類此大抵鈔合晉宋兩朝記注
梁書孔休源傳徐勉對武帝曰孔休源諸
練故實自晉宋起居注誦略上口似即謂
是書歟若是則梁代盛行其書其後一部
二十卷唐志作二十四卷者疑別爲一家
之書

宋永初起居注十卷

不著撰人

唐書經籍志宋永初起居注六卷藝文志同

按宋武帝以晉恭帝元熙二年六月受禪

改元熙二年爲永初元年至三年五月崩

永初紀元凡三年實首尾二年

宋景平起居注三卷

不著撰人

唐書經籍志宋景平起居注三卷藝文志同

按少帝即位明年改元景平次年五月乙

酉司空徐羨之中書監傅亮江州刺史檀

道濟揚州刺史王弘領軍謝晦以皇太后

令廢爲營陽王幽於吳郡六月癸丑徐羨
之等使中書舍人邢安泰弑帝於金昌亭
年十九景平紀元凡一年實首尾二年

宋元嘉起居注五十五卷梁六十卷

並不著撰人

文苑英華裴子野宋略總論曰曾祖太中大
夫西鄉侯以文帝之十二年受詔撰元嘉起
居注按裴松之卒於元嘉二十八年子野所撰蓋元嘉
十二年以前之注記爲所撰定者非盡出松之手也

唐書經籍志宋元嘉起居注六十卷

唐書藝文志宋元嘉起居注七十一卷

章氏考證初學記藝文類聚北堂書鈔太平

御覽並引元嘉起居注或題文帝元嘉起居

注或題元嘉十年起居注二十九年起居注

又引元嘉十三年十八年事題曰宋起居注

按文帝以少帝景平二年八月丁酉即位

改景平二年爲元嘉元年三十年二月甲

子爲元凶劬所弑崩

宋孝建起居注十二卷

宋大明起居注十五卷梁三十四卷

並不著撰人

唐書經籍志宋大明起居注八卷

唐書藝文志宋孝建起居注十七卷宋大明

起居注十五卷

章氏考證通典樂門引孝建起居注又太平

御覽四夷部引孝建二年事兩條題宋起居

注

按孝武帝文帝第三子也爲南中郎將江

州刺史都督四郡軍事元凶弑逆率衆入
討是年四月戊辰至於新亭己巳即皇帝

位五月丙申克定京邑劬及始興王濬諸
同逆並伏誅明年改元孝建凡三年次年

改元大明大明八年閏五月庚申崩

梁又有景和起居注四卷亡

不著撰人

宋書前廢帝本紀帝諱子業孝武帝長子也

大明八年閏五月庚申世祖崩即皇帝位明

年改元永光永光元年秋八月癸酉帝自率

宿衛兵誅太宰江夏王義恭尙書令驃騎大

將軍柳元景尙書僕射顏師伯廷尉劉德願

改元爲景和元年帝因悖日甚誅殺相繼內

外百司不保首領十一月戊午夜明帝與左

右阮佃夫王道隆李道兒密結帝左右壽寂

之姜產之謀共廢帝寂之懷刃直入姜產之

爲副帝欲走寂之追而殞之時年十七

按前廢帝在位首尾凡十九月景和之前

爲永光而是年十二月丙寅明帝即位又

改元泰始一歲凡三改元

梁又有明帝在藩注三卷亡

不著撰人

宋書明帝本紀明皇帝諱彧文帝第十一子

也元嘉二十五年封淮陽王二十九年改封

湘東王廢帝永光元年以衛將軍南豫州刺

史鎮姑熟景和末入朝被留停都廢帝誅害

宰輔殺戮大臣疑畏諸父並拘之殿內遇上

無禮收付廷尉一宿被原將加禍害者前後

非一既而害上意定明旦便應就禍上先已與腹心阮佃夫等密共合謀殞廢帝於後堂十一月二十九日夜也

宋泰始起居注十九卷梁二十三卷宋泰豫起居注四卷

並不著撰人

宋書本紀明帝即位詔曰改景和元年爲泰始元年泰始八年以疾患未痊改元泰豫泰豫元年四月己亥崩

章氏考證初學記御覽職官部並引宋泰始起居注又初學記寶器服食部御覽兵部引泰始二年事題曰宋起居注

梁有宋成徽起居注二十卷亡成當爲元

宋書後廢帝本紀帝諱昱明帝長子也泰豫元年四月己亥明帝崩即皇帝位明年改元元徽昱天性好殺以此爲權一日無事輒慘慘不樂內外百司人不自保殿省憂惶夕不及旦齊王順天之心潛圖廢立與直閣將軍王敬則謀結昱左右楊玉夫楊萬年陳奉伯等二十五人謀共取昱元徽五年七月七日夜玉夫與萬年入內以昱防身刀斬之奉伯提昱首與敬則敬則馳至領軍府以首呈齊王齊王奉太后令奉迎安成王皇太后令曰昱窮凶極暴自取灰滅故密令蕭領軍潛運明略廢昏立明雖曰罪招能無傷悼棄同品庶顧所不忍可特追封蒼梧郡王梁有昇明起居注六卷亡不著撰人

宋書順帝本紀帝諱準明帝第三子也泰始七年封安成王元徽五年七月戊子夜廢帝殞奉迎即皇帝位改元昇明昇明三年夏四月辛卯天祿永終禪位於齊遷居丹陽宮齊王踐阼封帝爲汝陰王建元元年五月己未殂於丹陽宮時年十三諡曰順帝

梁又有齊建元起居注十二卷亡

齊書高帝本紀帝諱道成字紹伯姓蕭氏南蘭陵人漢相國蕭何二十四世孫也受宋帝禪夏四月甲午即皇帝位改昇明三年爲建元元年四年三月壬戌崩武帝立

按本志此條在永明起居注之後其例蓋以亡書列見存書之次耳然先後編次雜亂與序言不符今移列於此以順時代據南史沈約傳及宋書自敘似沈約所撰次也

齊永明起居注二十五卷梁有三十四卷

沈約宋書自序永明二年又奏兼著作郎撰次起居注

齊書文學王逸之傳逸之以國子博士兼著作撰永明起居注又周顒傳顒侍文惠太子轉太子僕兼著作撰起居注

唐書藝文志齊永明起居注二十五卷

按齊武帝以建元四年三月即位明年改元永明永明十一年七月戊寅崩鬱林王立

梁有隆昌延興建武起居注四卷亡

齊書本紀鬱林王昭業文惠太子長子也太

子薨立爲皇太孫武帝崩太孫即位改元隆昌隆昌元年七月二十二日向書令西昌侯鸞使蕭諮等領兵入壽光閣殺之時年二十一以王禮葬 又曰海陵王昭文文惠太子第二子也立以爲帝是年七月丁酉即位改元延興十月辛亥以皇太后令廢爲海陵王十一月乃殞之年十五諡曰恭王 又曰明帝諱鸞始安貞王道生子也太后令入纂高帝第三子是年冬十月癸亥即位改元建武史臣曰隆昌延興建武一歲三改年號也

按建武紀元凡四年明年四月又改元永泰是年七月崩東昏侯立改元永元凡二年永泰永元記注不著錄

梁有中興起居注四卷亡

齊書本紀和帝諱寶融明帝第八子也永元元年封南康王爲荊州刺史東昏侯永元三年三月乙巳即位於江陵改元中興次年三月車駕東歸至姑熟丙辰禪位於梁四月丁卯梁王奉帝爲巴陵王宮於姑熟戊辰薨年十五尊爲齊和帝

按本志及七錄所載起居注自晉武帝迄齊約略備具唯晉惠帝缺永熙永康太安永安建武永興光熙七年齊明帝缺永泰一年東昏侯缺永元兩年

梁大同起居注十卷

隋書百官志梁武受命之初官班多同宋齊之舊祕書省著作郎一人佐郎八人掌國史集注起居著作郎謂之大著作梁初周捨裴

子野皆以他官領之

唐書藝文志梁大同七年起居注十卷

章氏考證太平御覽休徵部寰宇記江南西道並引梁大同起居注皆紀九年事御覽又一事引梁起居注爲大同六年事又御覽地部寰宇記劍南西道江南西道嶺南道引天監起居注

按梁武帝紀元凡天監十八年普通七年大通二年中大通六年大同十一年中大同一年太清三年其後簡文帝大寶一年豫章王天正一年元帝承聖三年敬帝紹泰一年太平二年此十卷新唐志明云大同七年則大同十一年之著紀尙不能全其所亡佚者多矣

後魏起居注三百三十六卷

魏書高祖孝文帝本紀太和十四年二月戊寅初詔定起居注制十五年春正月初分置左右史官

又李伯尚傳高祖時爲通直散騎侍郎勅撰太和起居注亦見北史敘傳

又房景先傳景先爲司徒祭酒員外郎侍中穆紹啓景先撰世宗起居注

又崔鴻傳景明三年爲員外郎勅撰起居注

正光元年遷司徒左長史修高祖世宗起居注

注又曰鴻撰十六國春秋世宗詔使呈上其書有與國初相涉言多失體且既未訖迄不奏聞鴻後典起居乃妄載其表曰云云

又王遵業傳遵業爲著作佐郎與司徒左長

史崔鴻同撰起居注遷右軍將軍慰勞蠕蠕乃詣代京采拾遺文以補起居所闕

北史魏收傳宣武時命邢潛追撰孝文起居注書至太和十四年又命崔鴻王遵業補續焉下訖孝明事甚悉按自太和十四年始定起居注之制故又命追撰自孝文帝延興元年以來迄太和十四年凡廿二年之記注以補前所未具

北齊書陽休之傳莊帝時李神雋監起居注啓休之與河東裴伯茂范陽盧元明河間邢子明等俱入撰次魏書文苑溫子昇傳莊帝建義初爲南主客郎中修起居注

後周書張軌傳魏孝武西遷兼著作佐郎修起居注

又柳蚪傳魏大統十六年遷中書侍郎修起居注

又薛寶傳魏廢帝元年領著作佐郎修國史尋拜中書侍郎修起居注

史通史官篇元魏置起居令史每行幸宴會則在御左右記錄帝言及賓客酬對後別置修起居注二人多以餘官兼掌

唐書經籍志後魏起居注二百七十六卷藝文志同

按後魏自東晉孝武帝太元十年丙戌道武帝始建號改元後爲明元帝太武帝太

武帝之十五年滅北涼沮渠氏而後諸國皆亡是爲北朝一統之始時南朝宋文帝

元嘉十六年也太武帝之後爲南安王文成帝獻文帝孝文帝宣武帝孝明帝孝莊

帝東海王節閔帝安定王孝武帝孝武帝

之三年始分爲東西魏東魏一世孝靜帝孝靜之十六年北齊高氏代之時梁武帝太清三年也西魏歷四世孝武帝文帝廢帝恭帝恭帝三年後周宇文氏代之時爲陳武帝永定元年丁丑之歲凡一百七十二年其有起居注則自孝文帝始其書爲南朝所撰斥至隋始著於錄

陳永定起居注八卷

陳書劉師知傳初世祖勅師知撰起居注自永定二年秋至天嘉元年冬爲十卷

按陳武帝於梁敬帝太平二年冬十月乙亥受禪即位改梁太平二年爲永定元年

至三年六月丙午崩文帝立

陳天嘉起居注二十三卷

陳書本紀世祖文皇帝即位明年改永定四年爲天嘉元年至七年二月詔改天嘉七年

爲天康元年是年四月癸酉崩太子立明年改天康二年爲光大元年光大二年十一月

甲寅慈訓太后廢爲臨海郡王出居別第太建二年四月薨時年十九

陳太建起居注五十六卷

陳書本紀光大二年十一月慈訓太后令廢帝爲臨海王以高宗宣皇帝入纂高祖兄始

興昭烈王道談第二子文帝弟也明年正月甲午即位改元太建太建十四年春正月甲寅崩皇太子叔寶立

陳至德起居注四卷

陳書本紀後主即位明年改太建十五年爲至德元年至五年正月改爲禎明元年至三年正月甲申隋總管賀若弼韓擒虎入宮城是夜後主爲隋軍所執丙戌晉王廣入京城三月己巳後主與王公百司發自建業入於長安隋仁壽四年十一月壬子薨於洛陽時年五十二追贈大將軍封長城縣公諡曰煬按陳代注記大抵略具唯禎明一朝不著於錄兩唐志唯有陳起居注四十一卷不著年號似殘佚所餘哀爲一帙者

後周太祖號令三卷

周書文帝本紀帝姓宇文氏諱泰魏孝武帝永熙三年七月丁未魏帝從洛陽率輕騎入關太祖乃奉帝都長安披草萊立朝廷軍國之政咸取太祖決焉是年十二月魏孝武帝崩太祖與羣公定策尊立魏南陽王寶炬爲嗣是爲文皇帝文帝大統十七年三月崩廢帝立廢帝三年太祖與公卿定議廢帝尊立齊王廓是爲恭帝恭帝三年冬十月乙亥太祖崩于雲陽宮年五十二諡曰文公孝閔帝受禪追尊爲文王廟曰太祖武成元年追尊爲文皇帝

章氏考證曰此號令三卷似宜列諸律令而入起居注類未詳其義

按經部小學家有周武帝鮮卑號令一卷雜號令一卷武帝爲文帝之子其書以語言文字爲主此非鮮卑語以軍國大事爲

隋開皇起居注六十卷

主雖曰後周實則西魏之政令也章氏謂宜入律令則別有大統式見後刑法類此不盡屬於律令有似起居注故入此類歟後周及北齊記注本志皆不見則隋時已盡亡矣

唐六典注曰漢獻帝及西晉以後諸帝皆有起居注並史官所錄自隋置爲職員列爲侍臣專掌其事每季爲卷送付史官史通云煬帝立起居置起居舍人二員開皇時尚未有專官也史通史官篇曰又案晉令著作郎掌起居集注撰錄諸言行勳伐舊載史籍者至隋以吏部散官及校書正字閑于述注者修之納言兼領其事又曰古者人君外朝則有國史內朝則有女史內之與外其任皆同隋世王劼上疏請依古法復置女史之班具錄內儀付于外省文帝不許遂不施行

唐書藝文志隋開皇元年起居注六卷

按隋文帝以周大定元年二月甲子受禪卽位改大定爲開皇元年至二十年十月廢皇太子勇及太子諸子爲庶人立晉王廣爲太子明年改元仁壽仁壽四年七月丁未崩此六十卷題曰開皇則不及仁壽新唐志僅存元年注記六卷又按王劼傳劼在文帝時爲員外散騎侍郎修起居注又云劼在著作將二十年專典國史則出於劼爲多也其後仁壽四年及煬帝大業十三年恭帝義寧皇泰首尾二年之注記皆不著錄殆亡於江都之亂矣

南燕起居注一卷

史通正史篇南燕有趙郡王景暉嘗事德超撰二主起居注本志篇敘曰其僞國起居唯南燕一卷不可別出附之於此

右四十四部一千一百八十九卷 實著錄四十二部附著亡書十二部通計五十四部

按此篇梁有亡書凡十二部而不計其數其後諸篇亦或計或不計爲例不一豈轉寫佚之歟

又按七錄敘目第二曰記傳錄卽史部也所載無正史古史雜史起居注四類唯有國史部二百一十六種注歷部五十九種知本志於此四類皆從隋代見存書目之例仍取七錄此兩部所有附注於其間也又本志此四類著錄並亡書合計少於七錄兩部所載凡三十二部而多出一千七卷

又按本志所注梁有永嘉建興起居注十三卷宋明帝在藩注三卷宋元徽起居注二十卷昇明起居注六卷齊建元起居注十二卷隆昌延興建武起居注四卷中興起居注四卷凡七部章氏考證皆失載

隋書經籍志考證卷十六

史部六

舊事類

漢武帝故事二卷

不著撰人

晉葛洪西京雜記序曰洪家復有漢武帝禁中起居注一卷漢武故事二卷世人希有之者今并五卷爲一秩庶免淪沒焉并所鈔西京雜記二卷及起居注故事三種爲一秩五卷也

唐書經籍志漢武故事二卷

唐書藝文志漢武帝故事二卷

宋史藝文志班固漢武故事五卷

崇文總目雜史類漢武故事五卷班固撰本題二篇今世誤析爲五卷

宋晁載之續談助鈔郭子橫漢武洞冥記跋曰張柬之言昔葛洪造漢武內傳西京雜記王儉造漢武故事並操觚鑿空恣情迂誕而學者就閱以廣聞見亦各其志庸何傷乎又曰右鈔世所傳班固所撰漢武故事其事與漢書時相出入而文不逮疑非固所撰也晁氏讀書志傳記類漢武故事一卷世言班固撰唐張柬之書洞冥記後漢武故事王儉造

四庫提要小說家曰漢武故事一卷舊本題漢班固撰然史不云固有此書隋志著錄傳記類中按此偶誤爲傳記類也亦不云固作晁公武引張柬之洞冥記跋謂出於王儉唐初去齊梁未遠當有所考也所言亦多與史記漢

書相出入而雜以妖妄之語然如藝文類聚三輔黃圖太平御覽諸書所引甲帳珠簾王母青雀茂陵玉腕諸事稱出漢武故事者乃皆無之又文選西征賦注引漢武故事二條其一爲柏谷亭事此本亦無之其一爲衛子夫事此本雖有之而文反略于李善之注考隋志載此書二卷諸家著錄並同錢曾讀書敏求記亦尚作二卷稱所藏凡二本一是錫山秦汝操繡石書堂本一是陳文燭晦伯家本又與秦本互異今兩存之云云今皆未見此本爲明吳琯古今逸史所刻併爲一卷僅寥寥七八頁蓋已刊削非兩家之本矣

按此書爲葛稚川家所傳而諸家著錄皆不考其所始六朝人每喜鈔合古書而王儉有古今集記疑儉鈔入集記中故張柬之以爲王儉造殆亦不探其本意爲之說歟兩唐志尚不云班固稱班固者自崇文總目始則莫詳其所據矣

西京雜記二卷

不著撰人

晉葛洪序曰洪家世有劉子駿漢書一百卷無首尾題目但以甲乙丙丁紀其卷數先公傳云歆欲撰漢書編錄漢事未得締構而亡故書無宗本止雜記而已失前後之次無事類之辨後好事者以意次第之始甲終癸爲十秩秩十卷合爲百卷洪家具有其書試以此記考校班固所作殆是全取劉書有小異同耳班固所不取不過二萬許言今鈔出爲

二卷名曰西京雜記以裨漢書之闕爾後洪家遭火書籍都盡此兩卷在洪巾箱中常以自隨故得猶在劉歆所記世人希有縱復有者多不備足見其首尾參錯前後倒亂亦不知何書罕能全錄恐年代稍久歆所撰遂沒並洪家此書二卷不知所故序之云爾

唐書經籍志西京雜記一卷葛洪撰又地理類重出一部

唐書藝文志葛洪西京雜記二卷又地理類重出一部二卷

宋史藝文志傳記類葛洪西京雜記六卷

晁氏讀書志雜史類西京雜記二卷晉葛洪撰初序言洪家有劉子駿漢書百卷乃當時欲撰史錄事而未得締思無前後之次雜記而已後學者始甲乙之終癸爲十卷以其書校班史殆全取劉書耳所餘二萬許言乃鈔撮之析二篇以裨漢書之闕猶存甲乙亥次江左人或以吳均依託爲之

陳氏書錄解題傳記類西京雜記六卷晉句漏令丹陽葛洪稚川撰其卷末言洪家有劉子駿書百卷先父傳之歆欲撰漢書難錄漢事未及而亡試以此記考校班固所作殆是全取劉書少有異同耳固所不取不過二萬餘言今鈔出爲二卷所謂先父者歆之於向也而館閣書目以爲洪父傳之非是按抱經堂校刊本作先公傳云且劉歆之時未有漢書名目館閣書目所言是陳氏之說非也唐藝文志亦只二卷今六卷者後人分之也按洪博聞深學江左

絕倫所著書幾五百卷本傳具載其目不聞有此書而向歆父子亦不聞其嘗作史傳於世使班固有所因述亦不應全沒不著也殆有可疑者豈惟非向歆所傳亦未必洪之作也

四庫提要小說家西京雜記六卷舊題晉葛洪撰黃伯思東觀餘論稱此書中事皆劉歆所說葛稚川采之其稱余者皆歆本文云云今檢書後有洪跋伯思所說蓋據其文案隋志載此書二卷不著撰人名氏指爲葛洪者實起於唐故唐經籍志注晉葛洪撰段成式西陽雜俎語資篇云庾信作詩用西京雜記事旋自追改曰此吳均語恐不足用晁公武稱江左人或以爲吳均依託蓋卽據成式所載庾信語也今考晉書葛洪傳載洪所著並無西京雜記之名則作洪撰者自屬舛誤特是向歆父子作漢書史無明文是以陳振孫等皆深以爲疑然庾信指爲吳均別無他證段成式所述信語亦未見於他書流傳既久未可遽更今姑從原跋兼題劉歆葛洪姓名以存其舊其中所述雖多爲小說家言而撫采繇富取裁不竭李善注文選徐堅作初學記已引其文杜甫詩用事謹嚴亦多采其語詞人沿用數百年久成故實固有不可遽廢者焉

又簡明目錄曰舊本或題漢劉歆撰或題晉葛洪撰實則梁吳均撰託言葛洪得劉歆漢書遺稿錄班固所不載者爲此書也 謹按此

與提要所言吳均未有他證兼題劉歆葛洪之說不符豈別有所據乎然葛洪序未又附有漢武禁中起居注一卷漢武故事二卷與此雜記合爲一帙五卷亦是吳均託言考歆是必不然

盧氏抱經堂校刊序曰此書或以爲晉葛洪著或以爲梁吳均撰余則以此漢人所記無疑也說苑新序二書皆在劉向前向校而傳之後人因名爲劉向撰今此書之果出於劉歆別無可考卽當以葛洪之言爲據洪非不能自著書者何必假名於歆書中稱成帝好蹴鞠羣臣以爲非至尊所宜家君作彈棋以獻此歆謂向家君也洪奈何以一小書之故至不憚父人之父求以取信於世也耶若吳均者亦通人其著書甚多皆見於梁書本傳知其亦必不屑託名於劉歆且其文卽俊拔有古氣要未可與漢西京埒則其不出於均又明甚隋志載此書於舊事不著姓名新舊唐書始題葛洪且入之地理類似全未寓目也夫冠以葛洪以洪抄而傳之猶說苑新序之稱劉向固亦無害其文則非洪所自撰凡虛文可以僞爲實事難以空造如梁王之集游士爲賦廣川王之發冢藏所得豈皆虛耶至陳振孫疑向歆父子不聞作史此又不然歷朝撰造莫然成編所云百卷特前史官之舊向傳之歆歆欲編錄而未成其見於洪之序者如此本不謂其父子皆嘗作史也洪以爲本之劉歆則吾亦從而劉歆之耳又何疑焉

按書錄解題謂向歆父子不聞作史雖博雅如杭東里人者亦信其說而不以爲非按史記匈奴傳末索隱引張晏云自狐鹿孤單于已下皆劉向褚先生所錄班彪又撰而次之所以漢書匈奴傳有上下二卷此劉向嘗續匈奴傳也漢書地理志云成帝時劉向略言其地分丞相張禹使屬潁川朱贛條其風俗猶未宜究此劉向撰地理分野爲地理志之始基史通史官篇云司馬遷既沒後之續史記者若褚先生劉向馮商揚雄之徒並以別職來知史務則劉向亦嘗領史職而馮商爲向弟子頗著列傳見藝文志春秋家史通正史篇又云史記所書年止漢武太初以後闕而不錄其後劉向向子歆及馮商等相次撰續迄於哀平間猶名史記至建武中司徒掾班彪以爲不足踵前史又雄歆褒美僞新誤後惑衆不當垂之後代後漢書班彪傳亦云司馬遷之後好事者頗或綴集時事章懷注曰好事者謂揚雄劉歆之徒也此皆非向歆父子作史之明證乎陳氏謂不聞作史傳於世特今不傳耳若兩漢之際二班之時其史見在卽列朝相傳之國史爲彪固之所依據者也歆本傳云爲義和京兆尹典儒林史卜之官則凡褚少孫以下史通所舉十五家之補續至劉歆時皆典領之葛稚川家所得乃其草具未修之初稿猶班彪有別錄蔡邕集漢事之類稚川

漢魏吳蜀舊事八卷

不著撰人

唐書經籍志漢魏吳蜀舊事八卷藝文志同

章氏考證北堂書鈔設官部引漢故事衣冠部引魏舊事太平御覽職官部引魏故事初學記中宮部書鈔設官部御覽兵部晉書禮志並引漢魏故事又水經溫水注引江東舊事魏志紀傳諸注引魏武故事

按此不知何人集兩漢三國舊事以爲一

編唐藝文志載漢建武故事三卷永平故

事二卷本志不著錄似即此漢舊事之別

本或即此八卷中佚出者

晉朝雜事二卷

不著撰人

唐書經籍志晉朝雜事二卷藝文志同

章氏考證北堂書鈔天部歲時部初學記政

理部御覽天部時序部人事部刑法部舟部

獸部共引晉朝雜事凡十三事

按梁書處士傳庾詵字彥寶新野人也幼聰警篤學經史百家無不該綜高祖少與詵善普通中詔爲黃門侍郎稱疾不赴中

深於三史之學有史記兩漢書鈔七十餘卷見前雜史類故能知其梗概鈔班書之所無者以爲此記其中亦有數條如趙飛燕女弟居昭陽殿之類見班書而刊除不盡者武帝欲殺乳母一事亦見褚少孫所補滑稽列傳中是實爲稚川所錄盧學士之序可爲定論毋庸疑也

晉宋舊事一百三十五卷

不著撰人

唐書經籍志晉宋舊事一百三十卷藝文志同

章氏考證初學記歲時部服食部御覽時序

部服章部並引晉宋舊事

按舊事即故事故事自東漢以來皆錄在

尙書宋書張茂度傳茂度子永爲尙書中

兵郎先是尙書中條制錄元嘉十八年

欲加治撰徙永爲刪定郎掌其任是永嘗

刪定尙書故事疑即是書其稱晉宋者殆

起於晉以來之條制歟

晉要事三卷

不著撰人

唐書藝文志晉要事三卷

章氏考證初學記中宮部書鈔設官部儀飾

部御覽服章部並引晉氏要事各一事

按舊唐志有晉故事三卷亦無名氏似即

此書新唐志又別有晉氏故事三卷似重

出

晉故事四十三卷

不著撰人

本志篇敘曰漢時蕭何定律令張倉制章程

叔孫通定儀法條流派別制度漸廣晉初甲

令已下至九百餘卷晉武帝命車騎將軍賈

充博引羣儒刪采其要增律十篇其餘不足經遠者爲法令施行制度者爲令品式章程者爲故事各還其官府摺紳之士撰而錄之遂成篇卷又刑法篇序云晉初賈充杜預刪定有律有令有故事

晉書刑法志曰賈充等撰律令兼刪定當時

制詔之條爲故事三十卷與律令並行

唐書經籍志晉故事四十三卷藝文志同

章氏考證初學記寶器部太平御覽珍寶部

並引晉故事又曰晉書禮志引咸寧三年武

皇帝故事

按晉書刑法志云其常事品式章程各遠

其府爲故事又曰凡律令六十卷故事三

十卷泰始三年事畢表上是晉初賈杜所

定者止三十卷此四十三卷殆後續修增

益亦莫詳其爲完書否也

晉建武故事一卷

不著撰人

唐書經籍志晉建武已來故事三卷藝文志同

章氏考證初學記武部王敦死祕不發喪云

云御覽兵部同藝文類聚東部獸部引咸和

六年合一事御覽獸部引咸和七年一事並

稱晉建武故事愚按王敦死在太寧二年餘

三事皆在咸和而入建武故事未審其義唐

志三卷無晉字按新唐志三卷無晉字者乃漢之建

武故事在應劭漢朝駁漢諸王奏事之前此晉建武以來

故事三卷在下文也

按元帝爲晉王改元建武明帝即位改元

太寧成帝改元咸和兩唐志所載並云建武已來故事三卷蓋其書不止建武一年之事故諸書所引有太寧咸和時事此一卷題建武故事非其全也成帝本紀咸康六年秋七月乙卯初依中興故事朔望聽政於東堂中興故事卽此書

晉咸和咸康故事四卷晉孔愉撰

晉書本傳愉字敬康會稽山陰人也吳平遷於洛惠帝末歸鄉里建興初始出應元帝召爲丞相掾仍除駙馬都尉參丞相軍事以討華軼功封餘不亭侯帝爲晉王使長兼中書郎累遷尚書僕射後爲會稽內史棄官居山陰湖南侯山年七十五咸康八年卒諡曰貞三子閭汪安國

唐書經籍志晉建武咸和咸康故事四卷孔愉撰一本誤作俞

唐書藝文志孔愉晉建武咸和咸康故事四卷

曲阜孔繼汾闕里文獻考曰古者朝廷之政令百司奉之藏於官府各修其職守而弗忘春秋傳曰吾視諸故府則其事也二十五代孫晉餘不亭侯愉有晉建武咸和咸康故事四卷

按本志但題咸和咸康兩唐志則並題建武蓋東晉元明成三朝之故事與前之建武已來故事三卷大抵略同惟此多一卷耳本傳不載是書當是官尙書時所集錄

晉修復山陵故事五卷車灌撰

晉書穆帝本紀永和十二年三月姚襄入於許昌以太尉桓溫爲征討大都督以討之秋八月己亥桓溫及姚襄戰於伊水大敗之襄走平陽徙其餘衆三千餘家於江漢之間執周成而歸使揚武將軍毛穆之督護陳午輔國將軍河南太守戴施鎮洛陽十一月遣兼司空散騎常侍車灌龍驤將軍袁真等持節如洛陽修五陵十二月庚戌以有事於五陵告於太廟帝及羣臣皆服總於太極殿臨三日

又叛逆桓溫傳溫欲修復園陵移都洛陽表疏十餘上不許進溫征討大都督委以專征之任溫自江陵北伐師次伊水姚襄屯水北距水而戰溫結陣而前親被甲督弟冲及諸將奮擊襄大敗自相殺死者數千人越北芒而西走追之不及遂奔平陽溫屯故太極殿前徙入金墉城謁先帝諸陵陵被侵毀者皆繕復之兼置陵令遂旋軍

通鑑輯覽永和十二年秋八月桓溫敗姚襄於伊水遂入洛陽修諸陵置戍而還冬十一月遣司空車灌如洛陽修五陵注宣景文武惠五帝陵也

唐書經籍志修復山林故事五卷車灌撰林當爲陵一本誤作東瀟

唐書藝文志車灌修復山陵故事五卷章氏考證初學記服食部太平御覽文部服用部器物部布帛部資產部並引修復山陵故事唐志卷同

按晉五陵者宣帝高原陵景帝峻平陵文帝崇陽陵武帝峻陽陵惠帝太陽陵也其見於本紀者元帝大興二年春正月丁卯崇陽陵毀五月癸丑太陽陵毀穆帝永和七年九月峻陽太陽二陵崩八年二月峻平崇陽二陵崩帝皆素服哭臨三日亦累詔遣使修復至是車灌以本官兼司空奉使乃集爲故事灌嘗爲豫章太守有集五卷見別集類他始末未詳

交州雜事九卷記士燮及陶璜事

不著撰人

士燮有春秋左氏經注見經部春秋類吳志本傳燮弟壹領合浦太守次弟輔領九真太守輔弟武領海南太守兄弟並爲列郡雄長一州偏在萬里威尊無上出入鳴鑼警備具威儀簫笳鼓吹車騎滿道胡人夾轂焚燒香者常有數十妻妾乘輜輶子弟從兵騎當時貴重震服百蠻尉佗不足論也燮董督七郡在郡四十餘歲黃武五年卒孫權以交趾縣遠乃分合浦以北爲廣州呂岱爲刺史交趾以南爲交州戴良爲刺史又遣陳時代燮爲交趾太守而燮子徽自署交趾太守發宗兵拒良呂岱被詔誅徽微兄弟六人皆伏誅壹薨及壹子匡後出權原其罪及燮實子歐皆免爲庶人數歲壹薨坐法誅厥病卒無子妻寡居詔在所月給俸米賜錢四十萬晉書陶璜傳璜字世英丹陽秣陵人也父基吳交州刺史璜仕吳歷顯位孫皓時爲使持

節都督交州諸軍事前將軍交州牧武平九
德新昌土地阻險夷獠勁悍歷世不賓瑱征
討開置三郡及九真屬國三十餘縣瑱既降
晉手書遺瑱息融勅瑱歸順瑱流涕數日遣
使送印綬詣洛陽帝詔復其本職封宛陵侯
改爲冠軍將軍在南三十年威恩著於殊俗
及卒舉州號哭如喪慈親後瑱子蒼梧太守
威領刺史在職甚得百姓心威弟淑子綏後
並爲交州自甚至綏四世爲交州者五人云
唐書經籍志交州雜故事九卷藝文志同

章氏考證藝文類聚雜器物部初學記政理
部太平御覽器物部並引交州雜事各一事
唐志作雜故事卷同 按此所引皆太康四年刺史
陶瑱表送林邑王范熊所獻方物還經其文實止一事也

晉八王故事十卷

不著撰人

晉書汝南王亮楚王瑋趙王倫齊王冏長沙
王乂成都王穎河間王顥東海王越列傳序
曰有晉諸王或出擁旆節蒞獄牧之榮或入
踐台階居端揆之重然而付託失所受任乖
方政令不恆賞罰斯濫或有才而不任或無
罪而見誅朝爲伊周夕爲莽卓機權失於上
構亂作於下楚趙諸王相仍構覺徒與晉陽
之甲竟匪勤王之師遂使昭陽興廢有甚奔
其乘輿幽繫更同美里胡羯陵侮宗廟丘墟
良可悲也向使八王之中一藩繫賴如梁王
之禦大敵若朱虛之除大慙則外寇焉敢憑
陵內難奚由竊發縱令天子暗劣鼎臣奢放

雖或顛沛未至土崩又曰西晉之政亂朝危
雖由時主然而煽其風速其禍者咎在八王
又曰自惠皇失政難起蕭牆骨肉相殘黎元
塗炭胡塵驚而天地閉戎兵接而宗廟隳支
屬肇其禍端戎羯乘其間隙悲夫詩所謂誰
生厲階至今爲梗其八王之謂矣

又武十三王列傳贊曰重以八王繼亂九服
沸騰嗚呼列代之崇建維城用藩王室有晉
之分封子弟實樹亂階

唐書經籍志晉八王故事十二卷盧琳撰
唐書藝文志盧琳晉八王故事十二卷

章氏考證世說方正篇雅量篇言語篇賞譽
篇品藻篇容止篇賢媛篇輕詆篇尤悔篇諸
篇注水經河水注史記項羽紀索隱文選舞鶴
賦注北堂書鈔藝文部設官部元和郡縣志
河南道太平寰宇記太平御覽服章部羽族
部並引晉八王故事唐志十二卷題盧琳撰
按汪師韓文選注引書目有晉氏八王故
事又有八王故事注則書中有注文

晉四王起事四卷晉廷尉盧琳撰

晉書盧欽傳欽范陽涿人也祖植漢侍中父
毓魏司空欽子琨琨子志志兄子琳志長子
琳 按琳當爲惠帝時嘗與志侍帝於薄陰敗績之後者史
不言其何官謹有集見別集類

晉書熊遠傳遠爲御史中丞時尙書刁協用
事衆皆憚之尙書郎盧琳將入直遇協於大
司馬門外協醉使琳避之琳不廻協令威儀
牽梓墜馬至協車前而後釋遠奏免協官

唐書經籍志四王起居四卷盧琳撰居當爲唐
唐書藝文志盧琳晉八王故事十二卷又晉
四王起事四卷

章氏考證水經蕩水注北堂書鈔衣冠部酒
食部御覽兵部服章部服用部器物部珍寶
部布帛部飲食部果部並引晉四王起事御
覽兵部又引一事與八王故事同

按諸書所引多惠帝征成都王穎六軍敗
績於蕩陰之事似所謂四王者爲齊王冏
成都王穎河間王顥長沙王乂惠帝永寧
元年趙王倫篡位四王同起兵以討之者
也後皆自相吞滅死於非命又晉書八王
傳序曰趙倫齊冏之輩河間東海之徒家
國俱亡身名並滅云云豈又此四王歟不
得而詳矣晉書八王傳所載殆即據此兩
書唐志謂兩書皆盧琳所撰而八王故事
多出二卷則本志記載未審也盧琳惟見
盧志熊遠傳各一事此殆其爲廷尉時而
作他始末未詳

大司馬陶公故事三卷

不著撰人

晉書陶侃傳侃字士行本鄱陽人也吳平徙
家廬江之尋陽成帝時累官使持節侍中太
尉都督荆江雍梁交廣益寧八州諸軍事荆
江二州刺史封長沙郡公年七十六薨贈大
司馬策諡曰桓侃在軍四十一載雄毅有權
明悟善決斷自南陵迄於白帝數千里中路
不拾遺時武昌號爲多士殷浩庾翼等皆爲